

Na osnovu Poglavlja VI člana 2. stava 2. i člana 4. Ustava Federacije Bosne i Hercegovine («Službene novine Federacije Bosne i Hercegovine», broj:1/94,13/97), i člana 13. Zakona o principima lokalne samouprave u Federaciji Bosne i Hercegovine («Službene novine Federacije Bosne i Hercegovine », broj 49/06), Općinsko vijeće Općine Goražde, na 42-goj redovnoj sjednici održanoj dana 30.08.2007 godine, usvojilo je :

S T A T U T OPĆINE GORAŽDE

I - OPĆE ODREDBE

Član 1.

Ovim Statutom, u skladu sa Ustavom i Zakonom, uređuje se samoupravni djelokrug jedinice lokalne samouprave, organi, međusobni odnosi organa, mjesna samouprava, neposredno učestvovanje građana u odlučivanju, finansiranje i imovina, propisi i drugi akti, javnost rada, suradnja jedinica lokalne samouprave, odnosi i suradnja sa federalnim i kantonalnim vlastima, kao i druga pitanja od značaja za organizaciju i rad Općine Goražde.

Član 2.

Općina Goražde je jedinica lokalne samouprave koja je uspostavljena zakonom, a predstavlja stanovništvo općine Goražde, štiti njihov interes i promovira razvoj.

Član 3.

Sjedište Općine je u Goraždu, ulica Maršala Tita broj 2.

Član 4.

Općina Goražde (u daljem tekstu: Općina) je pravno lice, sa pravima i obavezama utvrđenim Ustavom, Zakonom i ovim Statutom.

Član 5.

Općina ima grb, zastavu, pečat, kao i druga obilježja o kojima odlučuje Općinsko vijeće .

Član 6.

Službeni jezici u Općini su: bosanski, hrvatski i srpski jezik.

Službeno pismo je latinica i ćirilica.

Ostali jezici i pismo se mogu koristiti kao sredstvo komunikacije.

Član 7.

Teritoriju općine Goražde sačinjavaju mjesne zajednice koje su Statutom Općine Goražde iz 1992.godine ulazile u sastav općine Goražde, a novim teritorijalnim razgraničenjem su ostale u Federaciji Bosne i Hercegovine.

Teritorijalna organizacija mjesnih zajednica i općine regulira se posebnom odlukom Općinskog vijeća.

Član 8.

Općina Goražde je u sastavu Bosansko-podrinjskog kantona Goražde (u daljem tekstu Kanton).

Član 9.

Dan Općine je 18. septembar, kao jedan od najznačajnijih datuma u historiji Općine Goražde.

Član 10.

Općina može ostvariti suradnju sa drugim općinama i gradovima, radi efikasnijeg izvršavanja poslova od zajedničkog interesa. O oblicima i načinima suradnje, Općina zaključuje sporazum.

Općina može pristupiti međunarodnim udruženjima lokalnih zajednica i surađivati sa odgovarajućim lokalnim jedinicama drugih država.

Odluku o ostvarivanju suradnje, oblicima suradnje i Odluku o pristupanju međunarodnim udruženjima donosi Općinsko vijeće, pod uvjetima i na način propisan Ustavom, Zakonom i ovim Statutom.

II - SAMOUPRAVNI DJELOKRUG OPĆINE

Član 11.

Općina u okviru samoupravnog djelokruga, u skladu sa Ustavom i Zakonom ima vlastite nadležnosti, da :

- osigurava i štiti ljudska prava i osnovne slobode u skladu sa Ustavom;
- donosi Budžet Općine;
- donosi Program i plan razvoja Općine i stvara uvjete za privredni razvoj i zapošljavanje;
- donosi Plan zaštite od požara općine Goražde;
- utvrđuje i provodi politiku uređenja prostora i zaštite čovjekove okoline;
- donosi prostorne, urbanističke i provedbene planove, uključujući zoniranje;
- utvrđuje i provodi stambenu politiku te donosi program stambene i druge izgradnje;
- utvrđuje politiku korištenja i visinu naknade za korištenje javnih dobara;
- utvrđuje i vodi politiku raspolaganja, korištenja i upravljanja građevinskim zemljištem;
- utvrđuje politiku upravljanja i raspolaganja imovinom Općine;
- utvrđuje politiku upravljanja prirodnim resursima Općine i raspodjele sredstava ostvarenih na osnovu njihovog korištenja;
- upravlja, finansira i unapređuje djelatnosti i objekte lokalne komunalne infrastrukture:
 - vodosnabdijevanje, odvođenje i prerada otpadnih voda,
 - prikupljanje i odlaganje čvrstog otpada,
 - održavanje javne čistoće,
 - gradska groblja,
 - lokalni putovi i mostovi,
 - ulična rasvjeta,
 - javna parkirališta,
 - parkovi;
- organizuje i unapređuje lokalni javni prevoz;
- utvrđuje politiku predškolskog obrazovanja, unapređuje mreže ustanova, te upravlja i finansira javne ustanove predškolskog obrazovanja;
- osniva, upravlja, unapređuje i finansira ustanove osnovnog obrazovanja;

- osniva, upravlja, unapređuje i finansira ustanove i izgradnju objekata za zadovoljavanje potreba stanovništva u oblasti kulture i sporta;
- ocjenjuje rad ustanova i kvaliteta usluga u djelatnosti zdravstva, socijalne zaštite, obrazovanja, kulture i sporta, te osigurava finansijska sredstva za unapređenje njihovog rada i kvaliteta usluga u skladu sa potrebama stanovništva i mogućnostima Općine;
- analizira stanje javnog reda i mira, sigurnosti ljudi i imovine, te predlaže mjere prema nadležnim organima za ova pitanja;
- organizira, provodi i odgovorna je za mjere zaštite i spašavanje ljudi i materijalnih dobara od elementarnih nepogoda i prirodnih katastrofa;
- uspostavlja i vrši inspekcijski nadzor nad izvršavanjem propisa iz vlastitih nadležnosti Općine;
- donosi propise o porezima, naknadama, doprinosima i taksama iz nadležnosti Općine;
- raspisuje referendum za područje općine;
- raspisuje javni zajam i odlučuje o svom zaduženju;
- poduzima mjere za osiguranje higijene i zdravlja;
- osigurava uvjete rada lokalnih radio i TV stanica u skladu sa zakonom;
- osigurava i vodi evidenciju o ličnim stanjima građana i biračkih spiskova;
- obavlja poslove iz oblasti premjera i katastra zemljišta te evidencije o nekretninama;
- organizira efikasnu lokalnu upravu prilagođenu lokalnim potrebama;
- uspostavlja organizaciju mjesne samouprave;
- brine o zaštiti životinja;
- osniva i izdaje Službene novine općine Goražde i druga pitanja u skladu sa Ustavom i Zakonom.

Član 12.

Općina je samostalna u odlučivanju o pitanjima iz vlastitih nadležnosti, koje ne mogu biti ograničene ili uskraćene od federalnih ili kantonalnih vlasti, osim u slučajevima utvrđenim Ustavom i Zakonom.

Član 13.

Općini mogu biti povjereni i poslovi federalnih i kantonalnih vlasti zakonom, nakon konsultiranja organa Općine kojima se poslovi povjeravaju, uzimajući u obzir princip supsidijarnosti i sposobnosti lokalnih vlasti i njihove administracije da te poslove efikasno obavljaju, uz obezbjeđenje finansijskih sredstava.

III - ORGANI OPĆINE

Član 14.

Organi Općine su:

- 1.Općinsko vijeće i
- 2.Općinski načelnik-ca

1. OPĆINSKO VIJEĆE

Član 15.

Općinsko vijeće je predstavničko tijelo građana općine, koje funkciju vlasti vrši u skladu sa Ustavom, Zakonom i ovim Statutom.

Član 16.

Općinsko vijeće ima svoj Poslovnik.

Član 17.

Općinsko vijeće broji dvadeset pet (25) vijećnika-ca.

Mandat vijećnika Općinskog vijeća traje četiri (4) godine, a izbor se vrši na način i postupak utvrđen Izbornim Zakonom Bosne i Hercegovine.

U pogledu poštivanja prava nacionalnih manjina primjenjivaće se poglavlje 13.a Izbornog Zakona Bosne i Hercegovine.

Član 18.

Organ odlučivanja u Općini je Općinsko vijeće.

Općinsko vijeće u okviru svojih nadležnosti :

- priprema i dvotrećinskom većinom glasova usvaja Statut Općine;
 - usvaja budžet i izvještaj o izvršenju budžeta Općine, većinom glasova od ukupnog broja vijećnika;
 - donosi razvojne, prostorne i urbanističke planove i programe, te provedbene planove, uključujući zoniranje;
 - donosi propise o porezima, taksama, naknadama i doprinosima Općine u skladu sa zakonom;
 - donosi odluke o upravljanju i raspolaganju imovinom Općine;
 - donosi odluke o zaduživanju;
 - donosi programe uređenja građevinskog zemljišta;
 - donosi plan korištenja javnih površina;
 - donosi odluke o organizaciji mjesne samouprave i nazivima ulica, trgova, mostova i dijelova naseljenih mjesta;
 - donosi odluke o udruživanju Općine u Savez općina i druge oblike organiziranja;
 - donosi odluke o proglašenju praznika Općine;
 - donosi odluke o nagradama i priznanjima Općine;
 - bira i razrješava Predsjedavajućeg i zamjenika Predsjedavajućeg Vijeća;
 - donosi odluke o raspisivanju referenduma;
 - razmatra godišnje izvještaje o provođenju politike Općine i aktivnostima Načelnika-
- ce;
- osniva općinske službe;
 - osniva preduzeća i ustanove za obavljanje poslova od interesa za Općinu;
 - donosi Poslovnik Općinskog vijeća;
 - usvaja i donosi Plan zaštite od požara Općine Goražde;
 - obavlja i druge poslove utvrđene zakonom i Statutom.

Član 19.

Rad Općinskog vijeća je javan.

Kada je zakonom predviđeno, Općinsko vijeće može odlučiti da određena pitanja razmatra bez prisustva javnosti.

Član 20.

Općinsko vijeće donosi odluke većinom glasova ukupnog broja vijećnika-ca, osim u slučajevima propisanim ovim Statutom, na način koji je reguliran Poslovnikom.

Statut, odluku o osnivanju, odnosno o ukidanju mjesne zajednice, suglasnost za promjene granica općine i odluku o prenošenju poslova iz samoupravnog djelokruga Općine, Općinsko vijeće donosi dvotrećinskom većinom glasova od ukupnog broja vijećnika-ca.

Član 21.

Prva sjednica Općinskog vijeća u novom sazivu, biće održana najkasnije trideset (30) dana nakon objavljenih i potvrđenih izbornih rezultata.

Član 22.

Prvu sjednicu Općinskog vijeća u novom sazivu saziva Predsjedavajući prethodnog saziva Općinskog vijeća i njom predsjedava do izbora novog Predsjedavajućeg Općinskog vijeća.

Ako Predsjedavajući Općinskog vijeća prethodnog saziva ili njegov zamjenik ne sazove konstituirajuću sjednicu u roku iz prethodnog člana, sjednicu će sazvati najstariji vijećnik-ca novog saziva.

Član 23.

Na prvoj sjednici Općinskog vijeća vrši se izbor Predsjedavajućeg i zamjenika Predsjedavajućeg Općinskog vijeća, tajnim glasanjem, većinom glasova ukupnog broja vijećnika.

Predsjedavajući Općinskog vijeća i Općinski načelnik-ca u općinama ili Općinskim vijećima višenacionalnog sastava ne mogu biti iz reda istog konstitutivnog naroda.

Član 24.

Predsjedavajući predstavlja Općinsko vijeće i predsjedava sjednicama Općinskog vijeća.

Mandat Predsjedavajućeg i zamjenika Predsjedavajućeg Općinskog vijeća traje do isteka mandata vijećnika, osim u slučaju razrješenja ili smjene.

Predsjedavajući, odnosno zamjenik Predsjedavajućeg Općinskog vijeća mogu svoju dužnost obavljati profesionalno, o čemu odlučuje Općinsko vijeće.

Prava i dužnosti Predsjedavajućeg Općinskog vijeća i njegovog zamjenika utvrđuju se Poslovníkom.

Član 25.

Predsjedavajući i zamjenik Predsjedavajućeg Općinskog vijeća mogu podnijeti ostavku, odnosno mogu biti razriješeni ili smijenjeni prije isteka mandata odlukom Općinskog vijeća, koja je donesena većinom glasova ukupnog broja vijećnika.

Član 26.

Općinsko vijeće ima sekretara koji je državni službenik.

Sekretar Općinskog vijeća stara se o organizaciji i održavanju sjednica Općinskog vijeća, te zakonitosti akata koja donosi Općinsko vijeće.

Sekretara Općinskog vijeća postavlja Općinsko vijeće, po prethodno provedenoj proceduri od strane Agencije za državnu službu.

Član 27.

Općinsko vijeće može obrazovati stalna i povremena radna tijela, čiji se sastav, djelokrug i način rada uređuje Poslovníkom Općinskog vijeća.

Članovi radnih tijela Općinskog vijeća imaju pravo na naknadu za svoj rad koja se utvrđuje odlukom Općinskog vijeća u skladu sa zakonom.

OPĆINSKI VIJEĆNIK

Član 28.

Općinski vijećnik-ca (u daljem tekstu vijećnik) je predstavnik svih građana općine u Općinskom vijeću, izabran neposrednim i tajnim glasanjem, sa mandatom, pravima i obavezama propisanim Ustavom, Zakonom i ovim Statutom.

Član 29.

Vijećnik vrši svoje dužnosti prema svom slobodnom uvjerenju, a prisustvovanje sjednicama općinskog vijeća mora biti efektivno.

Vijećnik se u javnom životu treba ponašati na primjeren i etičan način, te obavljati svoje dužnosti savjesno i isključivo za dobrobit građana općine.

Član 30.

Prava i obaveze vijećnika određene su preciznije Poslovníkom Općinskog vijeća.

Član 31.

Vijećnici-ce odgovaraju za ustavnost i zakonitost akata koje vijeće donosi u okviru svoje nadležnosti.

2. OPĆINSKI NAČELNIK-ca

Član 32.

Općinski načelnik-ca je izvršni organ Općine, koji obavlja funkcije utvrđene Ustavom, Zakonom i ovim Statutom.

Izbor Općinskog načelnika-ca vrši se neposredno na način i po postupku utvrđenim zakonom.

Član 33.

Mandat Općinskog načelnika-ce traje četiri godine.

Općinski načelnik-ca može podnijeti ostavku ili biti opozvan u skladu sa zakonom. Postupak opoziva reguliše se Poslovníkom Općinskog vijeća.

Član 34.

Općinskog načelnika-cu za slučaj prestanka mandata iz razloga propisanih zakonom ili u slučaju spriječenosti da obavlja svoju dužnost privremeno mijenja Predsjedavajući Općinskog vijeća ili vijećnik-ca kojeg većinom glasova izabere Općinsko vijeće.

Član 35.

Općinski načelnik-ca u okviru svoje nadležnosti:

- predstavlja i zastupa Općinu;
- donosi akte iz svoje nadležnosti;
- izrađuje i Vijeću na usvajanje podnosi nacrt i prijedlog budžeta, ekonomske planove, razvojne planove, investicione programe, prostorne i urbanističke planove i ostale planske i regulatorne dokumente koji se odnose na korištenje i upravljanje zemljištem, uključujući zoniranje i korištenje javnog zemljišta;
- predlaže odluke i druge opće akte vijeću;

- provodi politiku Općine u skladu sa odlukama Vijeća, izvršava budžet Općine i osigurava primjenu odluka i drugih akata Vijeća;
- izvršava zakone i druge propise čije je izvršenje povjereno Općini;
- utvrđuje organizaciju službi za Općinsku upravu;
- donosi Pravilnik o unutrašnjoj organizaciji općinskih službi;
- realizuje suradnju sa drugim općinama, gradovima, međunarodnim i drugim organizacijama u skladu sa odlukama i zaključcima Vijeća;
- podnosi izvještaj Vijeću o ostvarivanju politike Općine i svojim aktivnostima.
- utvrđuje radno vrijeme i raspored radnog vremena.

Član 36.

Poslove iz prethodnog člana Načelnik-ca vrši samostalno i putem službi za upravu i drugih općinskih službi.

Općinskim službama za upravu rukovodi Načelnik-ca Općine uz pomoć pomoćnika Načelnika-ce koji imaju status državnih službenika.

Član 37.

Načelnik-ca odgovara za ustavnost i zakonitost akata koje donosi, odnosno predlaže Vijeću.

IV- MEĐUSOBNI ODNOSI OPĆINSKOG VIJEĆA I OPĆINSKOG NAČELNIKA-ce

Član 38.

Međusobni odnosi Vijeća i Načelnika-ce zasnivaju se na principima međusobnog uvažavanja i suradnje, uz pojedinačnu odgovornost za ostvarivanje vlastitih nadležnosti i zajedničku odgovornost za funkcioniranje Općine.

Član 39.

U roku od tri mjeseca nakon konstituirajuće sjednice Općinskog vijeća, Općinski načelnik-ca dostavlja Općinskom vijeću prijedlog koji sadrži osnove programa i politike koje treba ostvariti u toku mandata.

Član 40.

Općinsko vijeće vrši provjeru provođenja programa svake godine, najkasnije do marta za prethodnu godinu.

Ukoliko Općinsko vijeće smatra da je program postao u cijelosti ili djelomično neadekvatan, može odlukom pozvati Načelnika-ca da ga izmijeni, ukazujući na mjere i aktivnosti koje treba preduzeti.

Član 41.

Vijeće, odnosno Načelnik-ca može u roku od tri dana nakon donošenja odluke zatražiti da Vijeće, odnosno Načelnik-ca preispita odluku ili akt koji smatra neustavnim ili nezakonitim.

U slučaju iz prethodnog stava nadležni organ dužan je preispitati svoju odluku, odnosno akt u roku od trideset dana i obavijestiti Vijeće, odnosno Načelnika-ce o svojoj odluci do kada se taj akt neće izvršiti.

Kada Vijeće, odnosno Načelnik-ca potvrdi svoju odluku, odnosno akt, Vijeće, odnosno Načelnik-ca, može u roku od petnaest dana pokrenuti postupak preispitivanja odluke, odnosno akta pred nadležnim organom u skladu sa Ustavom i Zakonom.

Član 42.

Općinsko vijeće, odnosno Načelnik-ca može u roku od tri dana nakon donošenja odluke zatražiti da Vijeće, odnosno Načelnik-ca, preispita odluku ili akt koji smatra štetnim po interese ili imovinu Općine.

Organ, koji je donio odluku, preispitat će je najkasnije u roku od petnaest dana, do kada se ona ne primjenjuje.

Poslovníkom Općinskog vijeća će se bliže regulisati način i postupak po odredbama iz stava 1.- 2.ovog člana i člana 41.

Član 43.

Načelnik-ca je dužan redovno informirati Vijeće o ostvarivanju politike Općine.

Načelnik-ca će odgovarati na vijećnička pitanja i davati mišljenje o inicijativama, najkasnije u roku od petnaest dana od dana prijema.

Član 44.

Općinsko vijeće je dužno da razmotri prijedlog akta koji podnosi Općinski načelnik-ca i da se o istom izjasni najkasnije u roku od trideset dana.

V – MJESNA SAMOUPRAVA

Član 45.

Mjesna samouprava ostvaruje se u mjesnim zajednicama kao obaveznom obliku mjesne samouprave.

Član 46.

Mjesnu zajednicu osniva Općinsko vijeće odlukom, u skladu sa zakonom i Statutom Općine.

Odlukom o osnivanju mjesne zajednice utvrđuje se: naziv, sjedište, područje mjesne zajednice, mjesna područja, odnosno drugi dijelovi mjesne zajednice, kao i druga pitanja u vezi sa ostvarivanjem mjesne samouprave.

O promjeni naziva mjesne zajednice odlučuje Općinsko vijeće.

Član 47.

Inicijativu za osnivanje mjesne zajednice mogu pokrenuti građani (najmanje 10% birača od ukupno upisanih birača u birački spisak naseljenih mjesta), udruženja građana sa područja naseljenog mjesta za čije se područje predlaže osnivanje nove mjesne zajednice, Općinsko vijeće ili Načelnik-ca Općine.

Član 48.

O inicijativi za osnivanje mjesne zajednice glasa se javno na zborovima mjesnih zajednica, a inicijativa je prihvaćena ako se za nju izjasni 10% birača od ukupno upisanih u birački spisak naselja za čije se područje predlaže osnivanje mjesne zajednice.

Usvojena inicijativa se dostavlja Vijeću.

Član 49.

Nakon što je inicijativa o osnivanju mjesne zajednice iz prethodnog člana prihvaćena, Vijeće će u roku od 60 dana zauzeti stav o pravnoj valjanosti i osnovanosti pokrenute inicijative.

O prihvaćanju inicijative Vijeće donosi odluku.

Član 50.

Mjesna zajednica ima svojstvo pravnog lica u okviru prava i dužnosti utvrđenih Statutom i Odlukom o osnivanju.

Član 51.

Statutom mjesne zajednice, u skladu sa ovim Statutom i aktom o osnivanju utvrđuju se poslovi koje obavlja mjesna zajednica, organi, postupak izbora, organizacija i rad organa mjesne zajednice, način odlučivanja i druga pitanja od značaja za rad mjesne zajednice.

Statut mjesne zajednice donosi Zbor građana mjesne zajednice većinom od ukupnog broja prisutnih građana, a kojih ne može biti manje od trideset.

Član 52.

Mjesno područje je teritorijalno određen dio mjesne zajednice koji čini dio naselja ili jedno naselje ili više međusobno povezanih naselja.

Član 53.

Građani u mjesnoj zajednici kroz organe mjesne zajednice odlučuju o poslovima značajnim za život i rad na području mjesne zajednice, utvrđene zakonom, ovim Statutom i Statutom mjesne zajednice.

Član 54.

Općinsko vijeće može odlukom prenijeti na mjesnu zajednicu izvršavanje određenih poslova iz svoje nadležnosti, a naročito izgradnju, održavanje i upravljanje objektima za potrebe obrazovanja, sporta, kulture, infrastrukture i slično, uz obezbjeđenje finansijskih sredstava.

Član 55.

Prava i dužnosti mjesne zajednice utvrđena zakonom i ovim Statutom ne mogu biti uskraćena ili ograničena od općinske ili druge vlasti.

Član 56.

Organi mjesne zajednice su:

- Savjet mjesne zajednice i
- Zbor građana mjesne zajednice.

Član 57.

Organi mjesne zajednice donose programe i planove rada, koji moraju biti usklađeni sa politikom, programima i planovima Općinskog vijeća i Općinskog načelnika.

Organi mjesne zajednice mogu davati inicijative o pitanjima iz nadležnosti mjesne zajednice, općine i institucija koje vrše javna ovlaštenja.

Član 58.

Organi mjesne zajednice odlučuju o poslovima koji se finansiraju iz sredstava koja se neposredno prikupljaju od građana ili na drugi način i prenesenim poslovima iz člana 54. ovog Statuta, kao i inicijativi za raspisivanje referenduma.

Član 59.

Savjet mjesne zajednice je organ odlučivanja i konsultovanja po pitanjima od neposrednog interesa građana mjesne zajednice, koja su utvrđena zakonom, ovim Statutom i Statutom mjesne zajednice.

Savjet mjesne zajednice dužan je konsultovati Zbor građana mjesne zajednice prije donošenja odluka iz svoje nadležnosti.

Član 60.

Savjet mjesne zajednice biće obavezno konsultovan o pitanjima o kojima Općinsko vijeće odlučuje dvotrećinskom većinom i u postupku donošenja budžeta i planova Općine, kao i o drugim pitanjima o kojima je zatražena konsultacija od Vijeća ili Načelnika Općine.

Konsultovanje iz prethodnog stava vrši se u fazi priprema i u postupku donošenja odluka, a na način utvrđen Statutom mjesne zajednice.

O ostalim pitanjima Savjet mjesne zajednice će biti konsultovan na način i pod uslovima utvrđenim Statutom mjesne zajednice.

Član 61.

Član Savjeta mjesne zajednice je predstavnik građana mjesnog područja izabran neposrednim, tajnim glasanjem sa mandatom četiri godine.

Za člana Savjeta mjesne zajednice može biti izabran građanin upisan u birački spisak Općine, sa prebivalištem na području mjesne zajednice.

Strani državljanin sa boravištem na području mjesne zajednice najmanje godinu dana prije održavanja izbora, može biti počasni član Savjeta mjesne zajednice, o čemu odlučuje Savjet mjesne zajednice.

Izbori za člana Savjeta mjesne zajednice održavaju se istovremeno u svim mjesnim zajednicama i to najkasnije godinu dana nakon izbora Općinskog vijeća.

Broj članova Savjeta mjesne zajednice utvrđuje se Statutom mjesne zajednice, prema broju građana upisanih u birački spisak na području mjesne zajednice, s tim da svako mjesno područje u Savjetu mjesne zajednice mora biti zastupljeno sa najmanje jednim članom.

Ostala pitanja o načinu i postupku izbora za članove Savjeta mjesne zajednice, uredit će se Statutom mjesne zajednice, a u skladu sa Zakonom i ovim Statutom.

Član 62.

Zbor građana je organ konsultovanja o pitanjima o kojima odlučuje Savjet mjesne zajednice, kao i o pitanjima o kojima odlučuje Općinsko vijeće dvotrećinskom većinom, te u postupku donošenja budžeta i planova Općine, naročito u dijelu koji se odnosi na područje mjesne zajednice.

Savjet mjesne zajednice saziva Zbor građana mjesne zajednice po potrebi, a obavezno na zahtjev Općinskog vijeća, Općinskog načelnika-ce, kao i na inicijativu od najmanje 30 građana mjesnog područja za koje se održava zbor.

Član 63.

Nadzor nad radom mjesne zajednice vrši Općinsko vijeće.

Član 64.

Financijska sredstva za rad mjesne zajednice su:

- sredstva koja obezbjeđuje Općina u budžetu Općine u skladu sa ovlaštenjima, programima i planovima rada mjesne zajednice,
- sredstva obezbjeđena iz sredstava samodoprinosu,
- sredstva koja svojim aktivnostima ostvaruje mjesna zajednica,
- pokloni i druga sredstva.

Član 65.

Stručne i administrativno tehničke poslove za potrebe mjesne zajednice vrši nadležna općinska služba ili organi mjesne zajednice.

VI – NEPOSREDNO UČESTVOVANJE GRAĐANA U ODLUČIVANJU

Član 66.

Građani na teritoriji općine mogu neposredno da učestvuju u odlučivanju o lokalnim poslovima iz samoupravnog djelokruga Općine:

- referendumom,
- mjesnim zborovima građana,
- građanskom inicijativom i
- drugim oblicima.

REFERENDUM

Član 67.

Općinsko vijeće raspisuje referendum radi odlučivanja o prijedlogu za udruživanje Općine sa drugim općinama, o prijedlogu za promjenu granica općine i za uvođenje samodoprinosu. Općinsko vijeće može raspisati referendum i radi odlučivanja o prijedlogu za promjenu Statuta, o prijedlogu općeg akta i drugih pitanja iz djelokruga Općine i Općinskog vijeća, kao i drugim pitanjima određenim zakonom i Statutom.

Pravo na odlučivanje na referendumu imaju građani koji imaju prebivalište na području općine i koji su upisani u birački spisak.

Odluka donesena na referendumu obavezna je za Općinsko vijeće.

Član 68.

Prijedlog za raspisivanje referendumu mogu podnijeti:

- jedna trećina vijećnika Općinskog vijeća,
- Općinski načelnik,
- jedna trećina mjesnih zajednica.

Član 69.

Odlukom Vijeća o raspisivanju referendumu određuju se pitanja o kojima građani treba da se izjasne na referendumu, kao i područja nad kojima će se referendum provesti.

Postupak održavanja referendumu propisuje Vijeće Odlukom o raspisivanju referendumu u skladu sa zakonom.

Referendum provodi komisija koju imenuje Vijeće.

MJESNI ZBOR GRAĐANA

Član 70.

Na mjesnom zboru građana građani mogu raspravljati o svim pitanjima iz samoupravnog djelokruga Općine, te predlagati način rješavanja određenog pitanja, odnosno donošenja akata iz djelokruga Općinskog vijeća.

Mjesni zbor građana se održava za mjesno područje.

Građani na mjesnom zboru mogu inicirati i organizovanje poslova koji neposredno utiču na svakodnevne potrebe života i rada građana kao što su:

- izgradnja i održavanje putova, kanalizacije, vodovoda i drugih komunalnih potreba i infrastrukture,
- uređenje naselja, izgradnja i uređenje parkova, dječjih igrališta, sportskih i drugih objekata,
- zaštita okoliša i slično.

GRAĐANSKA INICIJATIVA

Član 71.

Građani mogu Općinskom vijeću podnositi inicijative za donošenje određenog akta ili rješavanja određenog pitanja iz njegove nadležnosti.

Ukoliko su za realizaciju građanske inicijative potrebna sredstva, inicijativa mora sadržavati prijedlog načina njihovog obezbjeđenja.

Općinsko vijeće mora razmotriti građansku inicijativu koju je svojim potpisom podržalo najmanje 3% birača upisanih u birački spisak, što prije, a najkasnije u roku od 60 dana.

Ukoliko Općinsko vijeće ne prihvati inicijativu birača iz prethodnog stava, najmanje 10% birača upisanih u birački spisak, svojim potpisom, mogu pokrenuti inicijativu za izjašnjavanje građana referendumom o toj inicijativi.

Ukoliko Općinsko vijeće ne prihvati inicijativu iz prethodnog stava, na zahtjev koji je svojim potpisom podržalo najmanje 20% građana upisanih u birački spisak, Općinsko vijeće je dužno raspisati referendum.

SLOBODNI OBLICI UDRUŽIVANJA I PARTICIPACIJA

Član 72.

Općina afirmiše društvene inicijative i aktivnosti na polju razvoja civilnog društva, socijalne brige, očuvanja okoline, kulturne i umjetničke baštine preko organizacija i udruženja građana, čiji su ciljevi humanitarnog, obrazovnog, naučnog, sportskog, rekreativnog, kulturnog i vjerskog karaktera.

Općina pridaje važnost konsultacijama sa stručnjacima i naučnim radnicima kao i sa stranim državljanima sa boravištem na njenoj teritoriji i afirmiše njihovo aktivno učestvovanje u izgradnji ekonomskog, kulturnog i socijalnog života građana općine i afirmiranju općine i njenog razvoja u cjelini.

Dajući značaj navedenim oblicima udruživanjima građana Općina obezbjeđuje:

- informacije i pristup administrativnim procedurama;
- pristup strukturama i općinskim uslugama;
- prezentiranje projekata ili dokumentovanje drugih planova i aktivnosti;
- prezentiranje Općinskom načelniku-ci i Općinskom vijeću prijedloge, primjedbe i sugestije.

Član 73.

Općina favorizuje aktivno učestvovanje međunarodnih organizacija, nevladinih organizacija stranih država i stranih državljana u definiranju programa i aktivnosti organa Općine.

Predstavnici iz prethodnog stava mogu aktivno učestvovati i davati prijedloge, sugestije i mišljenja na materijale koji se razmatraju na sjednici Općinskog vijeća, te mogu uzimati aktivno učešće u diskusijama, ali bez prava glasa kod donošenja konačnih odluka.

MOLBE, ŽALBE, PRIJEDLOZI

Član 74.

Građani i pravna lica mogu podnositi molbe, žalbe, pritužbe i druge podneske na rad općinskih organa, njihovih institucija i tijela, te na nepravilan odnos zaposlenih u tim tijelima kada im se obraćaju radi ostvarivanja svojih prava i interesa ili izvršavanja svojih građanskih dužnosti.

Odgovor na podnesene molbe, žalbe, prijedloge i drugo, Općinsko vijeće i organi Općine dužni su dati u roku od 30 dana od dana podnošenja prigovora i podnesaka.

VII – FINANSIRANJE I IMOVINA OPĆINE

Član 75.

Općina ima pravo na pokretnu i nepokretnu imovinu i na odgovarajuće izvore finansiranja kojima slobodno raspolaže u okviru svojih ovlaštenja.

Član 76.

Imovinom i finansijskim sredstvima Općina upravlja u skladu sa zakonom i drugim propisima, te u interesu lokalnog stanovništva općine.

Član 77.

O pribavljanju, korištenju, upravljanju i raspolaganju imovinom Općine, odlučuje Općinsko vijeće.

Član 78.

Općini pripadaju prihodi:

a) Vlastiti prihodi:

- porezi za koje Općina samostalno određuje stopu u skladu sa zakonom,
- lokalne takse i naknade koje utvrđuje Općinsko vijeće u skladu sa zakonom,
- kazne i kamate u skladu sa zakonom,
- prihodi od upotrebe i prodaje imovine,
- prihodi od preduzeća i drugih pravnih lica u vlasništvu Općine, kao i prihodi od koncesija u skladu sa zakonskim propisima,
- darovi, nasljedstva, pomoći i donacije,
- prihodi od samodoprinosu,
- prihodi od budžetskih korisnika,
- drugi prihodi utvrđeni zakonom ili odlukom Vijeća.

b) Drugi prihodi:

- prihodi od dijeljenih poreza, definiranim zakonom,
- transferi i dotacije od viših nivoa vlasti,
- udružena sredstva
- dug u skladu sa zakonom.

Član 79.

Općina može radi zadovoljavanja potreba građana prikupljati sredstva na osnovu neposrednog izjašnjavanja građana u skladu sa zakonom, odnosno ovim Statutom.

Odluku o pokretanju postupka prikupljanja sredstava na način utvrđen prethodnim stavom, donosi Općinsko vijeće na prijedlog jedne trećine vijećnika Općinskog vijeća, Općinskog načelnika, jedne trećine mjesnih zajednica na osnovu odluka zborova građana.

Član 80.

Ostvarenim prihodima Općina samostalno raspolaže kroz budžet koji donosi Općinsko vijeće u skladu sa zakonom i drugim propisima.

VIII – DONOŠENJE BUDŽETA

Član 81.

Prijedlog Budžeta Općine za slijedeću godinu podnosi Načelnik Općine na razmatranje Općinskom vijeću najkasnije do 01. novembra tekuće godine.

Budžet Općine donosi Općinsko vijeće većinom glasova od ukupnog broja vijećnika, a najkasnije do 31. decembra tekuće godine za slijedeću fiskalnu godinu.

Član 82.

Ukoliko Općinsko vijeće ne donese Budžet prije početka fiskalne godine, finansiranje se obavlja privremeno, a najduže za prva tri mjeseca fiskalne godine.

Odluku o privremenom finansiranju donosi Općinsko vijeće.

Privremeno finansiranje u smislu stava 1. ovog člana obavlja se razmjerno sredstvima utrošenim u istom periodu, odnosno najviše do tromjesečnog prosjeka za prethodnu fiskalnu godinu, umanjen za kapitalne investicije, izuzev onih kapitalnih investicija čija se realizacija nastavlja u tekućoj godini.

Član 83.

Budžet se mora usvojiti najkasnije do 31. marta tekuće godine.

Ukoliko se Budžet ne usvoji do 31. marta tekuće godine, Načelnik-ca proglašava Budžet.

Ukoliko Načelnik-ca, Vijeće ili jedna trećina vijećnika smatraju da usvojeni ili proglašeni Budžet u određenoj poziciji može ugroziti funkcioniranje Općine, mogu u roku od sedam dana tražiti arbitražu u skladu sa zakonom.

IX – PROPISI I DRUGI AKTI OPĆINE

Član 84.

Općinsko vijeće donosi slijedeće propise: Statut, Budžet, planske akte, odluke, pravilnike, poslovnike, deklaracije, preporuke, rezolucije i druge akte utvrđene Poslovnikom Općinskog vijeća.

Općinsko vijeće donosi rješenja i zaključke kao pojedinačne akte. Poslovnikom Općinskog vijeća utvrđuje se organizacija i način rada Vijeća, prava i dužnosti vijećnika, način i postupak donošenja propisa i akata Općinskog vijeća

Član 85.

Općinski načelnik-ca u izvršavanju zakona, propisa i općih akata iz samoupravnog djelokruga Općine, donosi: odluke, rješenja, zaključke, naredbe i druge akte za čije je donošenje ovlašten zakonom, drugim propisom, ovim Statutom ili odlukom Općinskog vijeća.

Član 86.

Akti organa i tijela Općinskog vijeća su rješenja i zaključci.

Protiv prvostepenih akata Općinskog načelnika i organa i tijela Općinskog vijeća donesenih na osnovu propisa Općinskog vijeća i Načelnika-ce, u drugom stepenu po žalbi odlučuje Općinsko vijeće.

Drugostepeni postupak po žalbama vodi Komisija za statutarna pitanja i propise u skladu sa Zakonom o upravnom postupku.

Član 87.

Odluke i drugi opći akti objavljuju se u Službenim novinama Općine Goražde/Bosansko-podrinjskog kantona Goražde prije nego stupe na snagu.

Odluke i drugi opći akti stupaju na snagu u pravilu osmog dana od dana objavljivanja.

Izuzetno, odluke i drugi opći akti mogu stupiti na snagu danom objave u Službenim novinama Općine Goražde/Bosansko-podrinjskog kantona Goražde.

X – STATUTARNE PROMJENE

Član 88.

Promjene Statuta vrše se amandmanima.

Prijedlog za pokretanje postupka za promjene Statuta može podnijeti jedna trećina vijećnika Općinskog vijeća, Općinski načelnik-ca i Komisija za statutarna pitanja i propise.

Prijedlog iz stava 2. ovog člana mora biti obrazložen, a podnosi se Predsjedavajućem Općinskog vijeća u pismenoj formi.

Inicijativu za promjenu Statuta Općine mogu dati građani, putem mjesnih zborova.

Član 89.

O nacrtu amandmana za promjenu Statuta raspravlja se na sjednici Općinskog vijeća.

Prihvaćeni nacrt promjena Statuta dostavlja se vijećnicima Općinskog vijeća, Savjetima mjesnih zajednica, udruženjima koja djeluju na području općine, radi vođenja javne rasprave o predloženim promjenama i davanja primjedbi i prijedloga, nakon čega se prijedlog amandmana upućuje Vijeću na usvajanje.

Ako se ne prihvati prijedlog za promjene Statuta, isti se ne može ponovo staviti na dnevni red sjednice Općinskog vijeća prije isteka šest mjeseci.

O promjeni Statuta odlučuju građani referendumom ako se promjene odnose na član 67.stav 1.

Promjena Statuta iz prethodnog stava je usvojena ako se za nju izjasni većina građana koji su izašli na referendum.

XI – JAVNOST RADA ORGANA LOKALNE SAMOUPRAVE I TRANSPARENTNOST

Član 90.

Općina osigurava javnost rada u postupku donošenja odluka omogućavanjem građanima da neposredno prisustvuju u postupku donošenja odluka, u skladu sa zakonom, ovim Statutom i Poslovníkom Općinskog vijeća.

Član 91.

Transparentnost rada Općina ostvaruje kroz otvorenost postupka realizacije općinskih propisa i akata, kroz primjenu zakona i drugih propisa, te kroz upoznavanje javnosti sa njihovom primjenom.

Transparentnost se obezbjeđuje kroz slobodu pristupa informacijama i informiranja javnosti, objavljivanjem izvještaja, budžeta i drugih sadržaja, putem sredstava javnog informiranja, vlastitog informacionog sistema i drugih oblika informiranja.

Član 92.

Općina objavljuje donesene propise i akte iz svoje nadležnosti.

Općina neće objaviti ili na drugi način učiniti javno dostupnim propise i akte čije bi objavljivanje bilo u suprotnosti sa zakonom i drugim propisima i aktima Općinskog vijeća, kao ni informacije koje se odnose na privatnost trećeg lica, osim ako je to opravdano javnim interesom.

XII – JAVNA PRIZNANJA OPĆINE

Član 93.

Vijeće dodjeljuje javna priznanja građanima, organima, organizacijama, ustanovama i udruženjima građana za zasluge na području društvene, privredne, kulturne, sportske i druge aktivnosti.

Javna priznanja Općine su priznanja koja se utemeljuju posebnom odlukom Općinskog vijeća.

XIII – ODNOSI I SARADNJA SA FEDERALNIM I KANTONALNIM VLASTIMA

Član 94.

Općinske i kantonalne vlasti djeluju zajednički na partnerskim osnovama, osim u oblasti administrativnog nadzora koji veže federalne i kantonalne vlasti u pogledu rada vlasti u Općini.

Član 95.

U vršenju povjerenih ovlaštenja Općina primjenjuje uputstva i smjernice koje dobije od federalnih i kantonalnih vlasti u skladu sa zakonom.

Član 96.

U postupku donošenja propisa koji se direktno tiču Općine, obaveza je federalnih i kantonalnih vlasti da u najvećoj mogućoj mjeri konsultuju Općinu.

XIV – PRELAZNE I ZAVRŠNE ODREDBE

Član 97.

Danom stupanja na snagu ovog Statuta prestaje da važi Statut Općine Goražde broj: 01-023-28 od 19.02.1998. godine koji je usvojen na sjednici Općinskog vijeća održanoj 19.02.1998. godine, a objavljen u Službenim novinama Bosansko-podrinjskog kantona Goražde, broj: 5/98, te Odluka o izmjenama i dopunama Statuta Općine Goražde («Službene novine BPK Goražde», broj 13/99 i 16/00).

Član 98.

Općina će uskladiti svoje propise i akte sa ovim Statutom u roku od šest mjeseci od dana stupanja na snagu ovog Statuta.

Stupanjem na snagu ovog Statuta prestaju da važe odredbe propisa i drugih akata Općine koji su u suprotnosti sa ovim Statutom.

Član 99.

Ovaj Statut stupa na snagu osmog dana od dana objavljivanja u Službenim novinama Općine Goražde i Službenim novinama Bosansko-podrinjskog kantona Goražde.

**Broj: 01-05-4065
Goražde, 28.09.2007.godine.**

PREDSJEDAVAJUĆI VIJEĆA

Smajo Baščelija, dipl.ing.maš.